

ADAT PERPATIH

NILAI DAN FALSAFAHNYA.

OLEH .

TAN SRI A.SAMAD IDRIS.

KERTAS KERJA

ADAT PERPATIH : NILAI DAN FALSAFAHNYA

OLEH :

Y.BHG. DATO' SERI UTAMA TAN SRI HJ ABD SAMAD BIN IDRIS
PENGURUSI, LEMBAGA MUZIUM NEGERI
NEGERI SEMBILAN DARUL KHUSUS

DIBENTANGKAN :

DI SEMINAR PERMURNIAN INSTITUSI DATO'- DATO' ADAT
ISTANA BESAR SERI MENANTI

PADA

25 - 29 OKTOBER, 1999
DI RESORT SERI MENANTI,
NEGERI SEMBILAN DARUL KHUSUS

Dr. Muhammad Zainur

SECEBIS MENGENAI :

ADAT PERPATIH, NILAI DAN FALSAFAHNYA

Sebelum saya menghuraikan dengan lebih lanjut berhubung dengan 'Adat perpatih, Nilai dan Falsafahnya ada baiknya saya bentangkan di sini terlebih dahulu perkara yang sering menjadi kekeliruan bagi kebanyakan orang yang tidak mendalami apakah sebenarnya yang dikatakan '**Adat**' itu, supaya dapat kita memanfaatkan '**sudah terang lagi bersuluh**'.

Tidak sedikit orang yang keliru mengenai dengan istilah '**adat**' ini. Bila disebut saja '**adat**' fikiran orang ramai tertumpu dan menerawang terus kepada apa yang disebut '**adat istiadat**' yang kebiasaan atau yang lazim kita lihat dan lakukan seperti adat nikah kahwin, adat bercukur anak, adat pinang memining, melenggang perut dan lain-lain seumpamanya yang berbentuk kesenian termasuklah juga adat istiadat yang berhubung kait dengan istana dan raja-raja.

Satu lagi perkataan yang lazim kita sebut ialah '**adat resam**', tetapi ada juga orang yang memisahkan dua perkataan ini - adat dan resam. Kononnya adat resam tidak sama maksud dan ertinya dengan '**adat atau resam**'. Ianya adalah berlainan pada sifat, arah maksud dan maknanya.

jika kita tilik secara yang agak mendalam sedikit, pendapat yang kedua ada juga benarnya, kerana adat resam itu adalah berbeza maksud dan sifatnya. Sebaliknya jika ditinjau dari sudut dan pandangan yang pertama, bahawa adat itu hanyalah merupakan 'kebiasaan' atau kelaziman seperti adat istiadat tadi 'adat resam' itu tidak boleh dipisahkan tentang maksud dan sifatnya, malah ia dapat dikatakan sama.

Sebaliknya jika kita kaji secara yang agak lebih mendalam lagi berhubung dengan istilah apa yang dikatakan 'adat' itu, nyatakan adat dan resam itu berbeza dalam maksud dan sifatnya.

Dibawah ini saya akan cuba huraikan serba sedikit untuk renungan dan pertimbangan kita bersama. Adat pada umumnya adalah satu-satu amalan yang ghalib atau lazim yang biasa diamalkan oleh satu-satu kelompok masyarakat dalam mengatur cara hidupnya sehari-hari. Dari bilangan atau kelompok yang kecil akhirnya menjadi besar dengan bilangan manusia semakin membiak maka lahirlah apa yang disebutkan masyarakat, negeri atau negara.

Manusia semakin hari semakin pandai dan bertamadun telah menggunakan akal dan fikirannya mengatur cara hidup mereka dengan menjadikan adat dan kebiasaan itu untuk mentadbirkan masyarakat, negeri dan negaranya.

Begitu jugalah dengan Adat Perpatih yang telah diwaris dan dipesakai dari nenek moyang orang-orang Melayu di Negeri Sembilan yang dibawa oleh orang-orang Minangkabau. Adat Perpatih ini bukan saja menjadi resam dan kebiasaan bagi orang-orang Melayu di Negeri Sembilan dalam percaturan hidup bermasyarakat sehari-hari, malah lebih dari itu, Adat Perpatih adalah 'hukum' yang undang-undang dalam sistem sosial masyarakatnya di samping menjadi undang-undang dalam pentadbiran negeri seperti yang diperkuatkan dalam perbilangan:-

Biar mati anak jangan mati adat

Tak lekang dek panas, tak lapuk dek hujan

Dianjak layu, dicabut mati

Gemuk berpupuk segara bersiram

Berjenjang naik, bertangga turun

Patah tumbuh hilang berganti

Pesaka bergilir, seka berwaris

** Adat bersendi hukum, hukum bersendi kitabullah*

Syarak mengata, adat mengikut (memakai)

Adat dan syarak sandar menyandar

Adat Perpatih sekaligus adalah peraturan hidup bermasyarakat dan berpolitik serta pentadbiran negara yang terjalin dengan konsep demokrasi. Konsep demokrasi dalam Adat Perpatih ini amat jelas dinyatakan:-

*Bulat air kerana pembentung
Bulat kata kerana muafakat
Ke gunung sama didaki
Ke Lurah sama dituruni
Hati gajah sama dilapah
Hati kuman sama dicecah*

Dalam melantik ketua-ketua masyarakat pula jelas ia dipilih dengan suara ramai seperti diungkapkan dalam pepatahnya, (lihat muka lain).

Pepatah petiti dan perbilangan yang sering diungkapkan bukanlah kata-kata kosong semata-mata untuk indah didengar bak kata orang '**indah khabar dari rupa**', tetapi adalah satu peraturan yang menjadi pegangan dan hukum dalam sistem sosial masyarakatnya. Oleh itu sekiranya ada tanggapan yang menyebut Adat Perpatih terlalu mengongkong cara hidup bermasyarakat dalam masyarakatnya, hanyalah dibuat melalui penilaian yang amat negatif.

PERANAN PENJAJAH

Sebelum penjajahan Inggeris mempengaruhi pentadbiran Negeri Sembilan. Adat perpatih adalah sumber rujukan segala peraturan dalam sistem sosial masyarakatnya. Atau sekarang lebih dikenali sebagai **Undang-undang** yang mengatur cara pentadbiran politik negeri dan hidup bermasyarakat.

Adat Perpatih juga telah mengajar manusia dalam sistem pentadbiran berdemokrasi dan paling ulung di dunia ini. Pepatah yang menyebut '**berjenjang naik bertangga turun**' itu agak jelas mencerminkan betapa kentalnya sistem demokrasi dituntut dalam pentadbiran Adat Perpatih. Malah amalan demokrasi itu dipraktikkan dalam menyusun pentadbiran negeri di mana orang ramai (rakyat) diberikan hak dan kebebasan memilih dan dipilih seperti perbilangannya :-

Bulat Anak buah menjadikan Buapak

Bulat Buapak menjadikan Lembaga

Bulat Lembaga menjadikan Penghulu/Undang

Bulat Penghulu/Undang menjadikan Raja

(menjadikan - memilih)

Pepatah petiti dan perbilangan ini adalah hubungan adat (Undang-Undang) yang menjadikan pegangan dalam memutuskan satu-satu perkara berbangkit. Tetapi setelah Inggeris mencampuri pentadbiran negara maka undang-undang British telah dipakai sehingga pentadbiran mengikut sistem Adat Perpatih itu hilang dan dilenyapkan, yang tinggal hanyalah 'adat istiadat' yang dipakai sewaktu nikah kahwin, pembahagian pesaka, adat di Istana, istiadat mengadap raja dan seumpamanya.

Hinggalah sekarang generasi muda telah terbawa-bawa membuat tafsiran bahawa Adat Perpatih ini sudah ketinggalan zaman, usang dan lapuk. Anggapan ini jika dipandang dari satu sudut memang kedapatan benarnya. Saya tidaklah menyalahkan mereka kerana sebenarnya mereka tidak tahu apa itu '**Adat perpatih**'. Sebab itulah dalam pepatah petiti Melayu ada disebutkan '**tak kenal maka tak cinta**' - disebabkan mereka tidak kenal Adat Perpatih maka kerana itulah mereka tidak menyintainya.

Memang tidak dapat dinafikan ada di antara peraturan-peraturan adat itu yang agak usang dan semestinya diganti atau diperbaiki. Adat itu sendiri telah mengungkapi :

Usang-usang diperbaharui
Yang lapuk diganti
Yang koyak ditampal
Yang panjang dikerat
Yang pendek disambung
Adat atas tumbuhnya
Pakat atas buatnya
Ibu adat muafakat

Di sini tidak timbul anggapan ia 'dibuang' atau dicampakkan ke tepi, sebaliknya dinilai semula supaya :
yang baik dipercepatkan supaya dapat baiknya, yang buruk dilambatkan biar dapat baiknya semula.

Hidup kita di zaman moden ini pun, undang-undang dan peraturan yang dibuat adalah sentiasa dipinda dan diperbaharui, malah ada yang dibuang langsung, kerana semuanya adalah ciptaan manusia. Oleh itu ianya perlu disesuaikan dengan peredaran zaman dan perubahan masa yang serba maju ini.

Begitu jugalah halnya dengan Adat perpatih itu sendiri. Ia sudah melalui proses alam kira-kira lima abad lamanya. Apa yang terjadi dan berlaku 500 atau 600 tahun yang lalu, malah lebih lama dari itu, sudah pasti tidak sama dengan apa yang terjadi dalam kurun 20an ini. Orang-orang tua dulu telah melakukan beberapa perubahan bila orang-

orang Minangkabau telah memeluk Agama Islam dengan menambah : **adat bersendikan hukum, hukum bersendikan kitabullah.**

Tadi saya katakan, sebelum negeri kita dijajah Inggeris dalam akhir kurun yang lalu, Adat perpatih adalah menjadi pegangan dalam sistem pentadbiran Negeri Sembilan, baik dari segi melantik pembesar-pembesar negeri, hukum jenayah, pembahagian pesaka dan lain-lain umpamanya. Semuanya berpandu dan didasarkan menurut adat, pepatah petitih, perbilangan itu telah menjadi peraturan dan panduan dalam hukum beradat.

Sebis contoh yang paling kecil dan betapa tingginya nilai falsafah adat ini dapat kita perhatikan dalam ungkapan pepatah :

Kerbau tak berkandang, seladang

Padi tak berpagar, lalang

Cubalah tafsirkan perbilangan ini. Bagi saya kata-kata ini amat tinggi nilainya. Jika anak-anak buah memegang dan mempraktikkan kata-kata ini nescaya mereka tidak akan menemui sebarang pertengkaran dan pergaduhan dekat rumah dan dekat kampung kerana :

Yang memiliki kerbau harus dikandang

Yang memiliki sawah padi harus dipagar.

Dalam pada itu terjadi juga sesuatu yang tidak diinginkan kerbau terlepas dari kandang, pagar sawah roboh dirempuh kerbau, padi jiran dimakan juga oleh sang kerbau, maka di sini barulah berdirinya adat (Undang-undang) . Pemegang adat iaitu buapak, datuk-datuk lembaga atau datuk-Datuk penghulu akan menjatuhkan hukuman yang setimpal dan adil.

Lebih jauh dari itu ungkapan tersebut membawa pengertian yang lebih simbolik terhadap manusia sejagat. Selagi kita hidup sebagai manusia mestilah terlingkung dalam peraturannya :

*Rumah nan berkotak
Tangga nan berlaman
Jangja nan berelak*

Sekiranya tidak mengikuti peraturan adat maka samalah ertinya dengan 'seladang' yang tidak berkandang, atau 'sawah padi yang tidak berpagar. Kalau diteliti secara mendalam ada ribuan pepatah petiti yang telah dicipta, bagi kita di Negeri Sembilan saya tidak tahu dengan jelas berapa ramai lagi di antara kita yang masih ingat dan memahaminya. Sebagai pemegang teraju adat, saya meraskan ia amat perlu diketahui secara lebih mendalam supaya ia tidak hilang ditelan zaman.

Bagaimanapun, seseorang penghulu atau lembaga mestilah berdiri di atas benar. Mereka tidak boleh bersikap **"limau masam sebelah, perahu karam sekerat"** kerana adat telah menetapkan :

*Adat teluk timbunan kapal
Adat gunung timbunan kabus
Adat bukit timbunan angin
Adat pemimpin tahan diuji
Kemana akan beraja ke mamak
Mamak beraja ke Penghulu
PENGHULU beraja ke benar
Benar berdiri sendiri*

Setiap masalah yang diuji kepada seseorang pemimpin itu tidak seharusnya menjadikan mereka hilang punca, misalnya dialahkan oleh sogokan rasuah atau dipanggil **'Kuah kuning'** sehingga keadilan diketepikan. Sebaliknya seseorang pemimpin hendaklah menyelesaikan sebarang persengketaan.

*Macam menarik rambut dalam tepung
Rambut jangan putus, tepung jangan berserek
Kalau Keruh dijernihkan, kalau kusut diusai
Keruh di hulu, selesaikan di hulu
Keruh dihilir selesaikan di hilir*

Sebab itulah seseorang pemimpin dalam adat itu mempunyai ciri-ciri yang boleh memberikan teladan kepada kepimpinannya:

*Fikiran itu pelita hati
Tenang punca bicara
Hening seribu akal
Kerana sabar, benar mendatang.*

PENGHULU BERAJA KE BENAR

Seperti saya jelaskan tadi, seseorang penghulu atau lembaga tidak boleh bersikap '**limau masam sebelah atau perahu karam sekerat**' dalam menjalankan keadilan adat. Mereka tidak boleh menjadikan diri masing-masing :

*Puar condong ke perut
Kena ke perut dikempiskan
Kena ke mata dipejamkan
(Puar - sejenis pokok)*

Penghulu juga mestilah memegang teguh dan bersikap:

*Kata penghulu kata penyelesai
Berjalan di nan lurus
Berkata di nan benar
Berhukum di nan adil*

Penghulu juga hendaklah berpegang teguh dengan kata-kata adatnya:

*Biar mati anak jangan mati adat
Tak lekang dek panas
Tak lapuk dek hujan
Dianjak layu, dicabut mati.*

Walaupun anak sendiri yang melakukan kesalahan, ia juga mesti dihukum menurut besar kecil kesalahannya itu. Kerana adat itu adalah undang-undang maka ia mesti dipertahankan seperti diungkapkan :

Gemuk berpupuk

Segar bersiram

Terkilan anak buah, mengadu

Terkilan tua waris, memanggil

Bagi saya, saya mesti memberikan tabek hormat kepada Dato' Perpatih Nan Sebatang dan Dato' ketemenggungan yang telah menyusun dan mengatur adat ini dengan begitu indah susunan kata-katanya yang tersusun rapi.

Jika kita bawa ingatan kita di zaman 600 tahun yang lalu di mana manusia belum tahu menulis dan membaca, belum ada sekolah baik rendah mahupun tinggi; kedua-dua beradik Perpatih dan Ketemenggungan (Temenggung) dan tentunya dibantu oleh orang-orangnya telah dapat menyusun adat (undang-undang) yang agak lengkap sesuai dan selaras dengan zamannya malah sehingga kini masih **tak lekang dek panas dan tak lapuk dek hujan.**